

11. juni 2018

UKA2018/119

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiupparput:

Qanoq puisit amiinik tunisassiorneq siuarsarneqarsinnaava, kiisalu suut qanorlu iliuitsit sineriapput tamakkerlugu puisit amiinik tunioraernerup siunissami qaffasissumiitittuarnissaanut iluaqutaasinnaappat.

(Inatsisartunut ilaasortaq Jens Danielsen, Siumut)

Tamanik ilisimaneqarpoq nunatsinni puisit amiinik tunisassiorneq ukiuni kingullerni tunisaasartut eqqarsaatigalugit aningaasaliissutaasut tamakkerlutik atorneqarneq ajortut, naak Great Greenland A/S amernik tunisassiassanik amigaateqaraluartoq, ammit Great Greenland-mut apuunneqartinnatik nalilinngortillugit tunisassiarineqarsinnaasanngillat, nunatsinnimi illoqarfiit nunaqarfiillu amernik pisiortorfiusut ilaat sikuutillugit assartuinissaq ajornartarpoq, tunisassiassanillu tigoo-raasut amernik amerlanerusunik pisiortorsinnaagaluarnerat toqqorsivinnik amigaateqarnerup usinillu assartuisoqarsinnaasannginnerata ajoraluartumik sunnertarpaat, taamaalilluni amerlanerusunik pisiortorsinnaaneq killilerlugu, aningaasaliissutaasartut tamakkerlutik atorneqanngitsoornerannik kinguneqartartumik. Tamakku tamarmik amernik tunisassiornerup killilersorneqarneranik kinguneqartarput.

Siunissami amernik ammeriviup pilersorneqarnissaa qanoq pitsanngorsaavigneqarsinnaava? isumaqarluinnarpunga nunaqarfinni illoqarfinnilu amernik tigoo-raasut atugaat periarfissaallu pitsanngorsarneqartariaqartut, minnerunngitsumik toqqorsiveqarnikkut tigoo-raanerminnilu teknikkikkut atugarisaasa periarfissaasalu pitsanngorsarnissaat eqqarsaatigalugit.

Amernik tigoo-raasut Great Greenland sinnerlugu ammit pisiarineqarsinnaasut tigoo-rtarpaat ingerlannartumik “akilerneqaratik” aatsaammi tigooqqaagaat akilerneqartarput atorsinnaanersut nalilersuisarfimmut anngukkaangata nalilersorneqareeraangatalu, tamatuma tungaanut akeqanngitsumik sullissisuupput, taamatullu amernik tigooqqaasut tigooqqaagaat nalilersuiffiusuni tiguneqanngitsoortut akilerneqarneq ajorput tunniusseqqaarfiusuni tigooqqaasunut akissarsiatigut ajunngitsorsissutaaneq ajorlutik, oqartariaqarpunga amernik tigooqqaasut nersunartumik sulipput tunisassiorneq amernik illersorniarlugu, atugassarititaasut pitsanngorsarneqartariaqarput.

Ullumikkut amernik tigooqqaasut toqqorsivii qerititsivii naliginnaasuupput angerlarsimaffinni atorneqartartut assingi, qerititsiviit sarfamik atuinerat amernik tigooqqaasut namminneq aningaa-

sartuutigisarpaat, immikkummi amernik tigooraasut ajunngitsorsiaqaratik sulipput, amernik great greenland A/S-ip pisiaanik tigusigaangamik, ameq tigusartik nalilersuiffinnut anngutsinnagu akisarsineq ajorput ammillu tigooqqakkamik ilaat assersuutigalugu nalilersuiffiusuni akuerineqanngitsoorsimappata, sunnguamilluunniit pissarsissutigineq ajorpaat naak suliarinera annertugaluaqisoq, qassallugu errorlugu poortorlugu qerititsivimmilu uninngatinnera ilanngullugu aningaasartuutigalugu. Ila ullumikkut amernik tigooqqaausuusut atugarisaat pitsanngorsagassaaqaaq.

Amernik tigooqqaausut qanorliuna akilersorneqartut. Assersuutigalugu natsiup amia ataaseq tunisassiarineqarnissaminut akuerisaasimappat 50,00 kr-mik pissarsissutigisarpaat. Tassanngalu aningaasartuutitik matuniartussaavaat, neriuppunga tamatta takusinnaasavut amernik tigooqqaausut atugaat ajorluinnartut iliuuseqarfigineqassasut. Amernik tunisassiorneq inoqarfiit ilaanni pingaaruteqarpoq allatigummi periarfissaqarfiunngitsuni ameq aningaasarsiutaavoq.

Naluneqangilaq puisip amia suliarineqartinnani nalilingortinneqarsinnaanngimmat tamannalu aporfissat assigiinngitsut pissutigalugit ajornartorsiutitaqarsinnaavoq, qanoq aaqqissuussinikkut pitsanngorsarneqarsinnaava ?

Amernik tigooraasut Great Greenland-ip pisiarisassaa tigugunikku ingerlaannartumik 50,00 kr.-mik pissarsissutigisalersinnaavaat ?

Qerititsivitsigut, toqqorsivitsigut qanoq pitsanngorsaasoqarsinnaava ?

Ammit suliarineqartinnagit Great Greenland A/S-mi qanoq aningaasalersuisinnaaneq allatut aaqqissuunneqarsinnaava? tamatumani ilisimaneqarmat ammit suliarineqarfissaminut ammerivimmut apuunneqartinnagit taamaallaat tigooqqaausunut aningasartuutaasernerat.

Aaqqissuussassat eqqarsaatigalugit siunnersortimik atorfeqartitsinissaq piffissanngunnginnerpa soorlu nunalerinermi tamanna atorneqartoq?

Isumaqarpunga Nunatsinni puisit amiinik nioqqutissiorneq ajunngitsumik aaqqissuukkaanni ineriartorfiusinnaasoq, aamma ajunngitsumik kiffartuussinissamut isumaqatigiissuteqarnikkut aaqqissuussisoqarsinnaappat.

Oqallisilluarisi..